

M319: Maria Magdalena' (Verslegende I)

0,1 Swer daz ewige leben wil gewinnen .
0,2 der sol got gaentzlichen minnen .
0,3 Als sand MaRei Magdalen . tet .
0,4 der goet . ier sunde vergeben het .
0,5 Ier minne ze goet was so groez
0,6 daz sei des dehainen weis verdroez .
0,7 do in sein iunger liezen eine .
0,8 do belaib si mit chlage- vnt mit wainnen .
0,9 pei dem grabe staete .
0,10 nv merche wier was si da taete
0,11 war vmbe si stuent vnde wainte .
0,12 was si mit den baiden mainte .
0,13 Ir sten / ier wainen . hab wier vernome- .
0,14 ze nutze muezzen si vns chomen .
0,15 Dev minne machet daz si stuent .
0,16 als noch etliche leut . tuent .
0,17 Ier lait si ze wainnen dwanch .
0,18 manigen plich manigen gedanch /.
0,19 Het si her . vnd hin .
0,20 ob si in der svnde in .
0,21 den si liep hete / vnvercholen .
0,22 si wande er were ier verstoelen .
0,23 si chlagt daz ier lieb was toet .
0,24 so was daz ier andrev noet .
0,25 daz si in toeten nine vand .
0,26 wand si het doch ein tail gewant .
0,27 Vnd geminret ier smerzen .
0,28 den si hiet in ir herze- .
0,29 paz waere ir chome- ze troest .
0,30 het si den der sei von svnde erloest .
0,31 doch also toete- gesehe- .
0,32 So waere ir etliche genade geschehen .
0,33 Si vorichte daz ir minne chalde begunde .
0,34 ob si ir liep nine funde .
0,35 Wurd aber ir der liebe wunde .
0,36 So wer ir hertze mit minne ervnt
0,37 MaRia braht salben dar
0,38 damit si in gesalbet gar .

0,39 wolde haben dev suezze .
0,40 als si sein fuezze .
0,41 Gesalbet het vnd bewainet ee .
0,42 also wolde si in dannoch me .
0,43 Bewainet vnd besalbet haben .
0,44 So sueht in da er wart begraben .
0,45 do aver si in nine vand .
0,46 vnd daz ir troest also verswant .
0,47 daz si verloes ir arbit
0,48 Do buchs ir doch ier hertzen laite .
0,49 ze salben moecht si in nicht vinden .
0,50 aber ze wainen vnd ze hende winden .
0,51 was er ier vil nahen pei .
0,52 Ie mer vnd mer . wunt er sei .
0,53 so er sei ie verrer lie .
0,54 so er ier ie nahern gie .
0,55 zwene groeze smerzen .
0,56 trueht si in einem hertzen .
0,57 Die si mit wainen semften wolde .
0,58 si en west was si tuen scholde .
0,59 Si verdarb an gemuet vnd an leibe .
0,60 was waz ze tuenen disen weibe .
0,61 wand ir so vmaze vnd zer leiden was .
0,62 daz si von wainen ie genas .
0,63 Seit sei niemen troest
0,64 der sei von smerzen erloest .
0,65 daz sult ir haben fur wunder .
0,66 ez waren chomen besunder
0,67 Sand peter vnd sand Iohannes mit ier .
0,68 zu dem grabe . di liezen schier
0,69 sei al aine bei dem grabe .
0,70 in chlage in groezer vngelade .
0,71 Sand peter vnd sand Iohannes vorrichten sere .
0,72 do ne vorhte marei niht mere .
0,73 Si het verlorn allez ir liep .
0,74 Ir mochte ravber noch diep .
0,75 Mer genemen noch geschaden /
0,76 mit flust was si gar vberladen
0,77 Ir sele leben het si verlorn /
0,78 ir liep het si liecht verchorn .
0,79 Si gedacht ir wer pezzet der tot /
0,80 den leyden solhe not .
0,81 “Seit ich in lebendiv vinde niht /
0,82 waz ob mir toter dev genad geschit .
0,83 daz ich in totev vinde noch /
0,84 an den ich leben niht mochte doch .”
0,85 als starch als der tot ist div minne /
0,86 des wart marei wol inne .

0,87 Waz mochte ir der tot anders haben getan
0,88 Minne gewan ier ir sele an
0,89 minne . nam ir enphinden vnt sin /
0,90 den paide vuort minne hin .
0,91 Emphindende enphindet si niht .
0,92 Gesehende si auch niht gesiht
0,93 gehorende si niht gehoret .
0,94 alz ir leben ist gestoret
0,95 Si ist da niht da si da ist .
0,96 want si ist ellev gar pei christ .
0,97 Da er da was da was si da .
0,98 er was aver si en west wa .
0,99 Marcie wie sol dir gelingen /
0,100 waz herze waz rates was gedingen /
0,101 hast du das dv allein stest /
0,102 pei dem grab vnt niht gest /
0,103 an dein gewarhait hin dan /
0,104 als sein ivnger habent getan .
0,105 Dv choeme e vnt belibe nach in /
0,106 marei hast dv pezzet sin .
0,107 Pist du weiser dan si sein /
0,108 ist zv im grozzer dev minne dein .
0,109 Dan seiner ivnger zvo im sey .
0,110 ist dir sein lieb naher pei .
0,111 Daz si vurchtent vnt du niht .
0,112 nv mercht wa von daz geschit .
0,113 Si chvnd nich wan minnen /
0,114 si chvnde sich anders niht versinnen .
0,115 Si het ir selber vergezzen gar /
0,116 vrevde vorhte nam si niht war .
0,117 Si vergaz iedoch des niht /
0,118 der ir lieber was den anders iht .
0,119 Dannoeh was ein wnder daz /
0,120 daz si ioch sein gar vergaz .
0,121 Daz si in selben erchante niht /
0,122 wand so waer ir dev geschit .
0,123 niht geschehen noch der vnsin .
0,124 Daz si in dem grabe in /
0,125 Gesvochet het daz gelaubet mir .
0,126 waeren sinev wort beliben in ir .
0,127 So ne het si / vmb seinen tot .
0,128 niht gehabt dehain not .
0,129 Si hit sich seins lebens gevrevt
0,130 si het noch geweinet noch getovwert .
0,131 noch gehapt dehaine swaere .
0,132 Daz er verstoln waere .
0,133 Si het paz siner vrstende /
0,134 sich an alle misswende .

0,135 Gern' gevreut vnt mer /
0,136 frolich gesprungen wand er /
0,137 het ir gesaget daz er solde /
0,138 sterben vnt auch wolde /
0,139 an dem drittem tag ersten /
0,140 idoch begund ir ze herzen gen /
0,141 vmb seinen tot lait so groz /
0,142 daz si sinne wart so ploz /
0,143 Daz siner wort niht gedacht /
0,144 wand in ir hertz gacht /
0,145 So vngevueger vngemach /
0,146 da von ir ze gehen gesach .
0,147 si was laides also vol /
0,148 daz si / nicht mochte gedenchen wol /
0,149 allen sin het si verlorn /
0,150 aller gedinge het sei verchorn .
0,151 Rat het si dehainen /
0,152 si ne chunde niht wan wainen .
0,153 An der schit weind och si /
0,154 wand wainens chraft belaib ir pei .
0,155 Vnt do si waint do sach si nider /
0,156 in daz grab vnt waint wider .
0,157 Zwene engel sach si do /
0,158 di sazen in weizem gwant so /
0,159 ze dem haupt einer der ander ze den fuozen /
0,160 di wolten ir baid puezen /
0,161 Ir h'zen lait daz si trvog /
0,162 si vragt sei paid genvoch /
0,163 waz si so ser waint /
0,164 waz si mit ir chlag maint /.
0,165 O marei nv sich /
0,166 die engel wellent trosten dich /
0,167 Dv hast trost vunde- /
0,168 an deins maisters chvnden /
0,169 dv hast erzenie vunden .
0,170 Dir ist leycht paz geschehen /
0,171 den dv dich hast v'sehen .
0,172 Du suchts niwan ainen /
0,173 vnt niht mer dehainen .
0,174 Vnt hast zwene vunden /
0,175 die vil wol suochen chunden .
0,176 Die mvoste des genvegen /
0,177 mochte ez sich gevuegen .
0,178 ainen menschen suochest dv /
0,179 vnt hast zwen engel vunden nv .
0,180 Dv svochest ainen toten da /
0,181 vnt vunde zwen engel lebend sa .
0,182 di dv hast vunde- die sint bereit /

0,183 als in ze herze gie dein lait .
0,184 als si dich trosten wellen /
0,185 also gebarten di selben gesellen .
0,186 den dv svochest der tut dem gelich
0,187 als ob er niht acht ouf dich .
0,188 Dine zaehere er nine sicht /
0,189 dv ruofest vnt er en horte sin niht .
0,190 Er wil dines gebetes niht enphinden /
0,191 dv svochts vnt er laet sich nicht vinden .
0,192 Er tvot niht ouf dv clofest an /
0,193 dv gest im nach er vleuhet hin dan .
0,194 O we here Ihesu christ /
0,195 welch ein wandelunge ditze ist .
0,196 Marei wie hat sih dein lait gemeret /
0,197 wie ist er so gar von dir chomen /
0,198 von dem wir daz wol haben v'nomen
0,199 De- dv so liebe waere /
0,200 d' dir manger swaere .
0,201 Bvozte mit den svozen Worten sein
0,202 Dich beredete wid' der swester dein .
0,203 Der dich schermt wider seinen wirt /
0,204 daz dich d' nv verbirt .
0,205 hohe lopt dich der svoze /
0,206 do dv im sein fuoze .
0,207 mit tiwer salbe bestriche /
0,208 vnt von im niht entwiche .
0,209 vntz dv mit den zaehern dein /
0,210 auch wosche wol die fuoze sein .
0,211 Vnt trvochts mit deinem hare /
0,212 Dv wosch auch er dich ze ware .
0,213 Dv er dir v'gab dein svnde /
0,214 ez waren wol gestatte vnde .
0,215 da von so vnrain rainich vaz .
0,216 ain smerger haven hiez ez paz .
0,217 So schone gar gerainet ist .
0,218 daz got vnser h're christ .
0,219 Vrevde mit wirtschafft hat d' mit /
0,220 daz ist avch aller hailigen sit .
0,221 Eines berherten frevwent si sich /
0,222 saeligev mareie nu sich .
0,223 Wie linde er dir ouch het geben /
0,224 nu sein dir dine svnd v'geben .
0,225 Dvo er sprach daz svoze wort /
0,226 daz waz reicher salben / hort .
0,227 Si minrt den seren smerzen /
0,228 dines svndigens h'zen .
0,229 Wie minnechleichen er dich gruozte .
0,230 So dv pei im niht waere /

0,231 daz waz im also / swaere .
0,232 daz er vil wnderschier /
0,233 din swester sant nach dir .
0,234 Unt hiez di palde zv im chomen /
0,235 als wir an d' schrift haben v'nomen .
0,236 Wie froemdet er dich nv also /
0,237 war umb machet er dich niht vro .
0,238 Hey wie bald du chome dar /
0,239 vnt naeme seiner fuoze war .
0,240 vnt viel an sein fvoze /
0,241 wie verret sich von dir d' svoze .
0,242 O / Ihesv der peste /
0,243 swa dich maria west .
0,244 Da chom si vil palde hin /
0,245 ir lait gie in daz h'ze din .
0,246 So si trovwert so trovwerst ouch dv /
0,247 getrevwer herre wa rvist dv nv .
0,248 So si waint so wainnest du mit ir /
0,249 do si getrewer Ihesu chom zv dir .
0,250 Troestent het dv mit ir gerait /
0,251 "wa habe wir lazarn gelait ."
0,252 Durch ir lieb hiez dv in leben /
0,253 durch siv ruchtest im sein sele wid'gebe- .
0,254 Ir chlag dv ze frevden chertest /
0,255 din minnerinne dv freude lertest .
0,256 Dvo dv h're durch sei besund' /
0,257 taete ditze groz wnd' .
0,258 allersvozeste maister srich /
0,259 wa mit het dein liebev dich .
0,260 Seit ie icht betrvobet /
0,261 war an het ich gevebet /
0,262 wa mit het si dem svezem hertzen /
0,263 gemachet svezen smerzen .
0,264 waz hat dein minnerinne getan /
0,265 dar vmb dv dich so hebst hin dan .
0,266 wir gehorten seit nie sunt von ir /
0,267 war vmb schaidest dv sei von dir /
0,268 wir horten daz si was berait /
0,269 dvo dv in daz grab wrd gelait /
0,270 Dvo was si dev erst dar /
0,271 gesalbet wolte si vil gar /
0,272 haben deinen rainen leip /
0,273 hin wider chert daz getrev weip /
0,274 vil pald dv si dich niht vant /
0,275 vnt sagt ez deinen ivngern sa zehant /
0,276 Die chomen vnt sahen /
0,277 vnd begunden wid' gahen /
0,278 vil wnderpald von dem grabe /

0,279 dvo belaib si da pei mit vngehabe /
0,280 mit chlagen vnt mit wainen /
0,281 wil dv daz haizen vnt mainen /
0,282 svnd vnt vur sunde han /
0,283 daz hat si vleizchleich getan /
0,284 des mveg wir niht gelauben dir /
0,285 wir lesen von ir gir /
0,286 schol ez aver gir vnt minne sein /
0,287 nah d' gegenwart dein /
0,288 ist ez trewe di si hat zv dir /
0,289 so rvoch h're chvnden mir .
0,290 war vmb pirgest dv dich herre /
0,291 war vmb vleuhest dv si so verre /
0,292 daz si dich gehorn mach noch gesehen /
0,293 noch dir errvefen war umb ist daz geschehen /
0,294 Nv sint dir doch liep alle die /
0,295 di dich auch h're minnent hie /
0,296 vnt alle die dich svochent die vindent dich /
0,297 Dv sprichest so das las ich /
0,298 Qui mane uigilau'int ad me inuenient me .
0,299 daz schreib ich tivsche daz man z verste /
0,300 die zv mir frve wachent die vindent mich /
0,301 dise vrawe wachet vil frvo vnt svchet dich .
0,302 War vmb vindet si dich denne nicht /
0,303 ey h're durch welhe geschit /
0,304 daz wazz' daz von ir augen fleuzet /
0,305 die zaehher si durch dich gevzet /
0,306 die si vmb ir h'ren wainet /
0,307 waz hast dv h're ir da mit gemainet /
0,308 daz dv sei nu nicht trosten wil /
0,309 si het gewainet niht so vil /
0,310 do dv sei vmb ir prvoder troestes /
0,311 [...] [...]
0,312 ist si dir nv als lieb als e .
0,313 war vmb treibest dv ovf ir girde me /
0,314 O maist' vnt gezivch warhaft /
0,315 gedench an deines gezivges chraft /
0,316 gedench an dine warhait /
0,317 daz dv marthen het gesait /
0,318 marei het daz pest tail erwellet /
0,319 also hetest ir vur gezelt /
0,320 daz ir nicht wirt benomen /
0,321 merchet wol wie daz sei chomen /
0,322 w'liche welt si daz peste tail /
0,323 do si dich welt vnser aller hail /
0,324 wie ist av' daz war /
0,325 des nim ich h're selbe war /
0,326 daz dar nach geschriben ist /

0,327 seit dv ir benomen pist
0,328 Nv stet doch da daz ir nicht wirt benomen /
0,329 wie pist dv denne vo- ir chomen /
0,330 ist daz tail benome- nicht /
0,331 ob si z noch hat oder pei ir sicht /
0,332 waz svechet si denne so lange /
0,333 wes wenet ir daz sei gelange .
0,334 marei svocht daz si erwelt het /
0,335 vil nahen ir ze h'zen get /
0,336 vnt waint daz si sih hat v'lorn /
0,337 daz er sei so gar hat v'chorn /
0,338 O hvoter d' leute daz pist dv /
0,339 huote ir ir tales nv /
0,340 daz si ir hat erwellet /
0,341 oder wie d' warhait daz gezelt
0,342 daz wort daz von deinem mv-d ist chomen /
0,343 ez en wirt ir nicht benomen .
0,344 Man v'ste ez denne tavgen /
0,345 swie dv ir von ir avgen /
0,346 Getrewer h're seist benonomen /
0,347 so pist dv doch nicht von ir herzen chomen /
0,348 marey wes sovmet dv dich nv /
0,349 wes / trovwerst vnt wainest dv .
0,350 Dv hast die engel vnt sihest ovch sei /
0,351 vnt pist in genvoch nahen / pi
0,352 des la vrawe genvogen dich /
0,353 merch gedench vnd sich /
0,354 waz ob d' nach dem dv wainest /
0,355 den du svochest vnd mit trevwen mainest /
0,356 Etwes an dir chan enphinden /
0,357 da von er sehen noch / vinden /
0,358 dich leat sinnen gar wnechleichen leip /
0,359 mach ende vil getrvewez weip /
0,360 d' vil grozer chlage din /
0,361 la din vnmazez weinen sein /
0,362 Gedench daz er sprach zv dir vnt zv andern weiben /
0,363 "lat ewer wainen vmb mich beleiben /"
0,364 War vmb tvost dv des dv nicht vrloup hast /
0,365 da dv dein wainen niht beleiben last /
0,366 Er verpot wainen vnt dv wainest ie mere /
0,367 ich fuorchte daz dv in da mit betrvbest sere
0,368 wand waeren im liep die zaecher din /
0,369 so mochte ovch leichte er die sin
0,370 nicht enthaben / wand also tet er e .
0,371 da von getrvewev waine niht me .
0,372 hoere minen rat / vnt la dich genvogen /
0,373 daz er dir der engel troest rvecht gefvgen /
0,374 Frage die engel vnt wis in pey /

0,375 ob si leicht wizzen wa er sei .
0,376 oder waz mit im sey geschehen /
0,377 den dv svochest . vnt wil sehen .
0,378 Ich gelaub daz si dar vmb her /
0,379 chomen sein daz si dein ser /
0,380 vnt dein chlag minnern wellent /
0,381 dise himmelische gesellen /
0,382 daz si sein gezevge sein /
0,383 vnt daz si dich troesten des laides dein .
0,384 Er hab sei her gesant durch dich /
0,385 den dv svochest vnt ovch durch sich /
0,386 daz si sin vrstende sagen
0,387 vnt nemen mit trost dir dein chlagen /
0,388 Si sprachen “weip vmb waz /
0,389 wainnest dv sag vns daz /
0,390 welch ist deins laides geschit /
0,391 pirge vor vns dein zaecher nith
0,392 rvoch vns deinen mvot enpinden /
0,393 so lere wir dich dein gird vinden /.”
0,394 Dvo waz si so gar von ir selbe chomen /
0,395 ir waz ir sin so gar benomen /
0,396 daz si dehainen troest enphie /
0,397 an d’hainen troest si sich lie /
0,398 want daz si gedacht.(:) “ia laider ./
0,399 waz troestes ist ir paider ./
0,400 wer sint dise troestere /
0,401 si sint mir swaere /
0,402 si beswaerent mich vnt betrvobent /
0,403 dehainen troest si mir vbent /.
0,404 Ich svoch den scheph’
0,405 da von ist mir swaere .
0,406 Ellev geschephvede so ist mir geschehen /
0,407 ich / en wil der engel nicht sehen .
0,408 Ich wil pei in niht beliben /
0,409 si ne mvegen niht v’triben .
0,410 Meinew h’zenlichev ser /
0,411 si gemerent mir sei mer .
0,412 W’dent si mir sagende vil /
0,413 da ich in denne antrvrten wil
0,414 Nach iseliches wortes sinne .
0,415 So furchte ich daz si mein minne .
0,416 mer irren den si furderen sei /
0,417 dar vmb wil ich in nicht wesen pei .
0,418 nicht svoch ich die engele in svoch ich
0,419 den d’ sei als wol geschaffen hat als mich .
0,420 Ich svoch niht die engel da von laz ich siv wol sein .
0,421 Ich svoch den d’ als wol ist ir h’re als mein .
0,422 Mein h’re ist mir benome- /

0,423 ich en waiz war er ist bechome- .
0,424 Den svoch ich nich armev alainen /
0,425 er alaine mach mir mein waine- .
0,426 Benemen vnt mein lait /
0,427 nv ne waich ich wa er ist gelait .
0,428 Ich sich vmb mir so wol geschehe /
0,429 [...] [...]
0,430 Nvo en sihe ich sein noch vinde laeid' .
0,431 Noch die stat da er ist gelait d' enbir ich baid' .
0,432 We mir wa ist des mein h'ze gert /
0,433 o we war ist mein liep chert .
0,434 O we war schol ich gen /
0,435 we waz laides wil mich besten /
0,436 Ich svoche in in dem grab vnt han sein niht funden /
0,437 ich ruoft im vnt han sin' antrvrt nich enphunden .
0,438 Wa svoch ich dich o we mir /
0,439 wa chvm ich h're iesu zv dir /
0,440 Ich svoch vnt vinde nicht /
0,441 ich waiz wol was mir ze tvon geschit .
0,442 Ich wil alle die stete die ich mach /
0,443 durchlaufen vnt wil nacht noch tach /
0,444 baidev fvoz vnt ovgen /
0,445 vb' lovt vnt tovgen /
0,446 Gerasten lazen nimm' /
0,447 si mvozen arbaiten imm' .
0,448 pitterleichen enphinden /
0,449 vntz ich mvoze vinde- /
0,450 den mein sele da minnet /
0,451 wainet ovgen meiniv vnt rinnet .
0,452 Nv secht des daz ich . e . erplinde /
0,453 von wainen e ich des erwinde .
0,454 Ich en vind den h'ren meyn /
0,455 ir fuoze lat evwer rasten sein /
0,456 laufet fvoz pald vnt get /
0,457 vnt bewart daz ir geligt oder stet .
0,458 e daz meinen herren hab vunden /
0,459 we mir war ist mein vrvde v'swnden /
0,460 O we mir wa ist mein liep v'porgen /
0,461 Meines h'zen trost war vmb laest du mich in disen sorgen /
0,462 O ellew meiner sele suoze
0,463 o sealde meinev . schir mir gepvoze /
0,464 meines sm'zen d' ist vnzerliden /
0,465 ich en waiz welhes wellen welhez v'meiden /
0,466 mih vmbvangen herzen ser /
0,467 swar ih mich cher hin oder her .
0,468 zwo angst sint mir pei swelhe ich ercheuse
0,469 o we an ietwed' ich v'leuse .
0,470 Beliebe ich pi dem grab so vinde ich in / nicht .

0,471 gen ich der von vil we mir geschit .
0,472 Wand so en waiz ich niht war ich schol /
0,473 ia ich vnsaeligew si sint paidev laides vol /
0,474 Ich en waiz wa ich in svochen daz ist mein not /
0,475 daz ich von dem grabe chvm daz ist mein tot .
0,476 Gen ich da von daz ist ain solher smerze /
0,477 da von so gar verdirbt mein h'ze /
0,478 daz nindert dehain helf der zvo gehoret /
0,479 wand daz grab wrde leicht gestoret .
0,480 da von ist pezzet daz ich sein hvote /"
0,481 also gedacht dev getrevwe in ir gemvete /
0,482 "Ich wil hie sten vnt wil hie beleiben /
0,483 vnt wil al mein zeit hie v'treiben .
0,484 Ich mvoz an dirre hailigen stat st'ben
0,485 ob ich doch so saelich mocht w'den /
0,486 daz ich pi mines h'ren grab in / dirre erde /
0,487 doch totiv begraben w'de .
0,488 So waer doch etwaz geringer ein pvrde /
0,489 o we saelich wrde
0,490 ich armez weip .
0,491 o we saelich wrd min chrancher leip .
0,492 ob er begraben wrd pi dem maist' mein /
0,493 o we saelich mochte ovch mein sele sin .
0,494 ob si chome in daz w'de grab meynes h'ren /
0,495 waz mocht ir denne immer gewerren /
0,496 ob dev sel min armez weibes
0,497 vuore ovz d'e vazze meins chranchen leibes .
0,498 In / daz volle grab d' hohesten eren /
0,499 mein lip phlach meinner sel ie ze meren /
0,500 arbeit mit h'tzen sere /
0,501 av' ditz werde grab wirt mir ain ere ."
0,502 Mein leip waz ie miner sel swaerevu burde .
0,503 Ditz hochgelopt grab mir ain rvowe wrde .
0,504 Die weil ich leb so ist ditz grab min trost /
0,505 so ich av' von dem lebe- wrde erloest /
0,506 so ist ditz grab dev rvowe meyn /
0,507 die weil ich leb wil ich pei disem grabe sein /
0,508 lebendev vnt totev chvm ich d' von niht
0,509 ich beleib der pei swaz mir geschit /
0,510 Vnt vil vnsaeligew we nu we /
0,511 wie shol ich nv leben immer me .
0,512 O we wie vbel mir geschach /
0,513 dvo ich meinen h'ren legen sach /
0,514 daz ich pi disem grab dvo niht belaib /
0,515 dvo mich niemen der von traib /
0,516 war vmb hvet ich nith seynes leibes /
0,517 vnt des grabes we mich armez weibes .
0,518 so w' ich also niht verholn /

0,519 so want ich niht daz er wer v'stoln /
0,520 hete in ymen genomen / vnt het ich daz gesehen /
0,521 so w' mir der aintwederz geschehen /
0,522 ich het ez in gewert od' ich wer von in niht chomen /
0,523 het die gesehen die in heten genome- .
0,524 Ich wolt laeider gehalten haben di . e .
0,525 vnt han den eh'ren gelazen / o we .
0,526 Ich wolt der e gehorsam gewesen sein /
0,527 vnt han niht gehvotet den h'ren mein .
0,528 dem dev e pilleich gehorsam ist /
0,529 daz pist dv mein lieber h're Ihesv christ /
0,530 waz han ich armev an mir gerochen
0,531 want da mit wer dev e niht zeprochen .
0,532 Si waere [...] [...]
0,533 [...] [...] der ost'tach genevwet vnt geeret /
0,534 er waer mit disem toten niht gemailet
0,535 want der loben dich machet vnt hailet /
0,536 dirre tot vnraint niht di rainen /
0,537 er raint di vnrain den ich mit wainen /
0,538 Sveche d' macht alle die gesunt /
0,539 die in rvorent vnt tvet den chvnt .
0,540 Genade wand er erlivchtet sei /
0,541 die zv im chomen vnt im sint pei .
0,542 War umbe man aver ich armev mich .
0,543 Meines laides wan dv ich /
0,544 zv dem grab chom dv vand ich ez ovf getan /
0,545 den ich da svocht des vant ich nicht / vnt noch en han
0,546 Da von wil ich hie sten vnt warten /
0,547 ich wil hie peiten in disem garten .
0,548 ob er iemen hie erschine .
0,549 Nv av' von im die ivng' seine /
0,550 sint gegangen vnt habe-t mich alaine /
0,551 hie lazen als ich hie sten vnt waine .
0,552 ich sihe niemen hie mit mir chlagen /
0,553 wie mocht ich vnsaeligev daz v'tragen /
0,554 daz ist war ich han die engel gesehe-
0,555 vmb welhe sach av' daz sei geschehen /
0,556 war vmb si mir erschinen sint .
0,557 meiner sinne waz ich so / plint /
0,558 des en waiz ich niht /
0,559 oder waz mir vraevden da von geschit /
0,560 Waz trostes ich da von haben sol /
0,561 war vmb ich waine daz wizzen si vil wol /
0,562 war vmb sprechent si danne "wes wainest dv ."
0,563 Ich pitte sei daz si mir niht also sprechen zv /
0,564 wellent si daz ich niht waine so totent si mich .
0,565 iesv mein lieb ich mvoz wainen vnt svochen dich /
0,566 ich mvoz immer dew wainunde sin /

0,567 vntz ich dich vinde den h'ren mein /
 0,568 Ich wird in des nimmer vndertan /
 0,569 die weil ich meinen h'ren niht fvenden han /
 0,570 we arme mir nv vil armen
 0,571 wer wil sich nv vb' mich erbarmen .
 0,572 waz tvon ich wa vinde ich in ./
 0,573 war cher ich mich wa vind ich hin /
 0,574 waer raetet mir wen vrag ich /
 0,575 o we wer erbarmet sich vb' mich
 0,576 wer zaiget mir in den mein sel lip hat /
 0,577 wa er leit wer zaiget mir die stat .
 0,578 Ich pitte daz er minnechleich chvnt tvot /
 0,579 daz sich sere nah im senet mein mvot /
 0,580 vnt daz ich nach im v'swinde von sm'zen /
 0,581 vnt iamer nach im han in meynem h'zen /
 0,582 Dehain lait geleicht sich mein' sere /
 0,583 Ihesv mein lieb chere wider chere .
 0,584 O minnechleicher vnt meines h'zen girde /
 0,585 gib mir wider vraevde wirtschat wirde .
 0,586 vnt die sealde der gegenwarte din /
 0,587 zaig mir deins antlvtzez schein /
 0,588 daz dein stimme in meynev oren helen mvoz /
 0,589 o aller min troest o ellev mein sveze
 0,590 [...] [...] v'schit /
 0,591 o trewe meinev benim mir mein warten nicht /
 0,592 Do marei also iamerleich wort sprach /
 0,593 vnt sich vmbe chert seht wa si Ihesum stent sach /.
 0,594 Si en west niht daz er z waz /
 0,595 als ich . in dem ewangelio las .
 0,596 "waz wainest dv wem svochest dv /"
 0,597 also sprach ir iesus zv /
 0,598 o dv ellev gir sele gir /
 0,599 war vmb sprachest dv also ze ir /
 0,600 war vmb fragest dv waz si chlage /
 0,601 des sint noch nith drei tage
 0,602 daz si dich sach haben h're /
 0,603 vnt frages dv waz ir werre .
 0,604 Dv ir gedinge dv si dich sach haben .
 0,605 dvo sah si durch dein hent slahen /
 0,606 da mit dv sei gesegent diche /
 0,607 groz nagel mit iamerleichen bliche /
 0,608 ersach ovch dev vil rainev svze /
 0,609 alsam dvrch dine schone fveze .
 0,610 di e gewaschen vnt getrvchent het dev raine .
 0,611 mit ir zaehern mit ir hare . vnt vragest waz si waine .
 0,612 die si gechvsset het mit trevwen /
 0,613 daz begunde h're in / waine- nevwen .
 0,614 Isleich dein lait wart an gelait mit smerzen /

0,615 es wart durch dine seiten gegen dem h'zen
0,616 mit ainem grozem sper gestochen /
0,617 o we waz wart an dir totem gerochen /
0,618 seit si ditz allez het gesehen /
0,619 fragest dv si waz ir laides sei geschehen /
0,620 Nv sach si doch ir sel varen von ir /
0,621 wand dein sel h're dev ist ir .
0,622 daz sach si h're do dv leage tot .
0,623 do dv an dem chrevze litte die not /
0,624 dar zv hat si v'lorn dine- leip
0,625 den gesalbet wolt haben / ditze weip /
0,626 da mit si sich doch ain tail haben getrostet /
0,627 nv hat sei disev flvst ie mer vnt mer geroestet .
0,628 h're mein sprichest dv /
0,629 "war vmb wainest dv ."
0,630 o we svozer maister waz richest dv an ir /
0,631 div sich so gar gelazen hat zv dir .
0,632 War vmb weyns tu vnt raitzest ir h'ze /
0,633 dv alz ir liep dv aller ir smerze .
0,634 si hat sich so gar verlazen an dich /
0,635 daz si niht recht achtet ovf sich /.
0,636 Si / hat so gar an dich gelazen ir gewinnen /
0,637 daz ir anders niht chan gelingen .
0,638 si ist so gar in dir daz si niht anders rvochet /
0,639 dv pist alain den si da svochet /
0,640 si ret von dir so gedencht avch anders niht /
0,641 si fraget alaine von dir want si niht anders sicht .
0,642 da von ist leicht ovch daz geschehen /
0,643 daz si dich h're niht erchennet /
0,644 vnt vil pald dich niht nennet /
0,645 So gar ist si dvrch dich von ir selber chomen /
0,646 swie si doch dein stimme hat v'nome- .
0,647 si hat ir selb' dehainen tail lazen pei ir /
0,648 so gar ist si h're ellev pi dir .
0,649 Seit dv daz h're vil wol waist /
0,650 daz si ze niemen trait ir gaist /
0,651 war vmbe fragest dv sei getrevwer h're /
0,652 waz si svoch vnt waz ir wearre .
0,653 waenest dv daz si spreche "ich wain vnt svoche dich /"
0,654 e . dv h're zv ir sprechest "daz pin ich /
0,655 den dv da svochest vnt chlagest /"
0,656 e den dv ir selber sagest .
0,657 Die weil dv dich
0,658 vor ir hellen wil / waenst dv daz si dich
0,659 ymmer mvge erchennen /
0,660 e / dv dich oder sei gervochest nennen .
0,661 Si want dez daz ez der gartnaere
0,662 an aller shacht zweivel waere .

0,663 dar zv het si also zv im gerait .
0,664 "h're hast dv in ovf erhaben wa hast Dv in gerait .
0,665 daz sag mir da nim ich in /"
0,666 o minne sere an sin /
0,667 omaezich lieb vnmiezich leit .
0,668 Daz nieman mach gesagen noch hat gesait .
0,669 dez smerzen ein dicher wolchem hat bedacht /
0,670 dirre vrowen ovgen ez ist nicht nacht
0,671 daz si d' svnnen niht gesehen mach /
0,672 ez scheint doch dvrch iren venster der tach /
0,673 marei dvrch dines libes oren get d' svnne- schein /
0,674 vnt ilet vaste in daz h'tze dein
0,675 wol dich wart dir ist dein vinster nv benomen /
0,676 ez ist ayn / wnechleich liecht in din vinst' chomen .
0,677 daz av' si den niht mocht sehen / den si doch sach /
0,678 von starch' seneden minne daz geschach..(.)
0,679 dev het ir erblendet so dez h'tzen ovgen /
0,680 daz ir daz offenbaere liecht waz tovgen /
0,681 Nv merchet wie vbel disev vrawe gesicht /
0,682 si sicht Ihesum vnt erchennet sin doch niht .
0,683 Svochest Ihesum o getrevwe marei /
0,684 wa vmb erchennest dv sein nich libev sein amei /
0,685 erchennest av' dv vrawe in
0,686 war vmb svochent in denne dinev ovgen vnt dein sin
0,687 marei de- dv svochest d' svochet dich vnt ist pi dir /
0,688 vnt dv waenest vrawe daz ez daer gartner sei .
0,689 Er ist aine gartner daz ist niht gelogen /
0,690 daz av' Ihesus niht sei dez pist dv betrogen /
0,691 er ist Ihesus vnt ist ovch eine gartner /
0,692 av' also solt dv v'sten disev mer .
0,693 want er gvoten samen saet in die sele dein /
0,694 vnt in dev h'tze der gelavbigen sein /
0,695 er ist ain gartner dez man vil wol genevzet /
0,696 wand er gvotev werch phlanzet vnt begevzet .
0,697 In den selen aller gvoten levte .
0,698 ez ist Ihesus d' da mit rait ze divte .
0,699 Disez spiles sint gaistliche levte vro .
0,700 wan da von singet man an dem ymno .
0,701 Si fraget Ihesum waz Ihesus sei .
0,702 Ihesus sey ir benomen .
0,703 vozen vnt inne ist er ir pei .
0,704 vnt fragt doch war iesus sei chomen /
0,705 er powet ir sel vnt saet sich in sei .
0,706 vnt chan si sein doch nith bechomen .
0,707 Swie dv h're Ihesus spilest .
0,708 In den die Ihesum minnent gar .
0,709 dv spilest in in do dv dich hilest .
0,710 Ez ist niht gavkel ez ist waer /

0,711 grozer got wie dv dich stilest .
0,712 daz si dein doch niht werdent gewar /
0,713 marei ez ist Ihesus der mit ir raeit /
0,714 ez ist Ihesus daz ist dev ganzev warhait /
0,715 er redete mit dir vnt svochest dv in toten doch /
0,716 er lept vnt erchennest dv in niht lebende noch .
0,717 waerlich nv ist chvnt worden mir /
0,718 war vmb er sich verholn hat vor dir .
0,719 war vmb er sich dir niht zaigen wolde .
0,720 daz waz recht want er ez niht solde .
0,721 war vmb schol sich der zaigen dir .
0,722 dez dv niht svochest maria daz sag mir .
0,723 dv svochest den der nindert waz daz waz wnderleich .
0,724 vnt svochst den der doch waz waerleich
0,725 Dv svochest den toten der da waz begraben /
0,726 der waz erstanden wie mochtest dv den fvnden haben
0,727 toten dv er werliche lebende waz
0,728 Mortuum querebat . Ich waiz wol daz man also laz .
0,729 Ey vil svoz' maister ir vnt mein /
0,730 ich mach niht gar bereden die ivnger dein /
0,731 Ich mach vreilichen nicht gesch'men ir irretvom /
0,732 ob si doch verirret waz dv si svocht Ihesum .
0,733 Seit si dich avch toten an dem chreuze sach vnt toten nemen dr abe /
0,734 seit si dich ovch toten lazen het in dem grabe /
0,735 dv het ir daz lait vmb dinen tot den sin so gar benomen /
0,736 daz gedanch deines lebens in ir h'ze niht mochte chomen /
0,737 daz dv begraben waere / daz waz ir so lait .
0,738 Swaz ir von diner vrstend waere gesait /
0,739 da / mochte si dehainen gedingen haben zvo /
0,740 waz wil dv herre daz si anders tvo .
0,741 Dv ioseph begrvb dinen leip /
0,742 dvo begrvb ovch da mit ir gaist ditz getrevwe weip .
0,743 ir sel veraint sich so gar mit dem leibe dein /
0,744 daz noch leichter geschehen mochte sein /
0,745 daz sich ir sel da von ir leip mvoz leben /
0,746 von ir selber leibe het gegeben .
0,747 dan si sich geschaiden het von dinem totem leibe .
0,748 so liep waz dein leip disem getrevwen weibe
0,749 wand ir sel waz waerliche mer in dir .
0,750 dan si h're wear in ir .
0,751 Dvo het si h're svocht deinen toten leip .
0,752 do svochte ovch ir selber sel ditze getrevwe weip .
0,753 da si verlos deinen leip / da verlos si avch ir gaist .
0,754 So ist ovch daz nicht wnder als dv wol waist
0,755 daz si die weile niht sinne mach gehabt .
0,756 Die weil mit dir ir gaist ist begraben .
0,757 daz si dich nicht erchennet daz ist nicht wnder /
0,758 wand ir sel ist von ir leib besvnder /

0,759 ir sel wart mit dir begraben /
0,760 wie mochte si dich dvo erchant haben .
0,761 wa mit mag man erchennen wan mit dem gaist .
0,762 des wis er h're vollaist .
0,763 Irn gaist hast dv in dinem leibe /
0,764 den gib wider dise- weibe .
0,765 So gewinnet si wider ir sin /
0,766 vnt ist ir irretum da hin
0,767 wie waz auer dev verirret /
0,768 der dein tot ser wirret /
0,769 der so lait vmb dich ist /
0,770 der dv so recht lieb pist /
0,771 dev dich so gvetliche svochte /
0,772 dev anders troestes nicht en rvochte /
0,773 o we wear ich verirret so /
0,774 des vnsinnes waer ich vro .
0,775 waz aver es ain irretvm /
0,776 daz si niht chant iesum .
0,777 oder daz si want er waer noh tot /
0,778 daz tet ir mer des laides not .
0,779 vnt dev starchev minne
0,780 den daz si ze vnsinne /
0,781 dehain irretvm prachte /
0,782 oder daz si dehaines vngelavben ie gedacht .
0,783 Dar vmb nv rechter richtaere /
0,784 vnt barmherzen hilfaere /
0,785 dev starche minne die si het zv dir /
0,786 daz groz lait daz si hat vmb dich in ir /
0,787 daz berede si h're wider dich /
0,788 ob si nicht recht verdenchet sich /
0,789 ir trew schol sei vnschvldigen /
0,790 ir minne schol sei dir gehuldigen /
0,791 ob si leicht gegen dir verirret ist /
0,792 daz waz doch an valschen list .
0,793 Gedench nicht an des weibes vnsinne /
0,794 gedench an der ivngerinnen minne .
0,795 wand vngelavbe hat sei nicht von dir gewendet /
0,796 dein minne h're hat sei erplendet .
0,797 si wainnet herre von minne vnt von laide /
0,798 daz sei dehain irretvm von dir schaide /
0,799 daz ist noch ir vorch noch ir chlage /
0,800 daz ist noch ir gedanch noch ir sage /
0,801 von minne hat si also ze dir gerait /
0,802 "hast dv in genomen wa hast dv in / gelait /
0,803 daz sage mir da nim ich in /"
0,804 o welhech ain vil gar weiser vnsin /
0,805 wie wizenliche si nine waiz /
0,806 welch ain sleachter vmberaiz /

0,807 welch ain weiser irretvm /
0,808 daz si also vraget Ihesum /
0,809 welch ain weise tvmbē /
0,810 der wech trait nicht vmbe /.
0,811 So het si mit den engeln nicht gerait /
0,812 "hapt ir in genomen war hapt ir in gelait /"
0,813 Si sprach "mein h're genomen ist vnt gelait ich en waiz wa /"
0,814 si sprach nicht "hapt ir in / gelait da oder da /"
0,815 want dein engel het dich herre nicht genomen /
0,816 Dar avch dv herre waere chomen /
0,817 dar heten dich die engel nicht gelait .
0,818 Nv merche h're wie weisleich si reait /
0,819 si sprach aver herre zv dir /
0,820 "lieb h're nv sag mir /
0,821 hast dv in genomen wa hast dv in gelegt /"
0,822 nv m'ch z wie gar si sich bewegt /
0,823 Dvo si sprach "da nim ich in /"
0,824 nv m'ch z welch ain starker sin /.
0,825 Si sprach nicht zv den engeln "nv saget mir /"
0,826 want si chvnden niht gar sagen ir /.
0,827 Swaz von dir gar gesagen waere /
0,828 want daz sint verholnnew meare /
0,829 Si sprach ez av' herre zv dir /
0,830 dir waz nicht vnmvgleich ze sagen ir .
0,831 waz mit ir getan waz vnt wie
0,832 des waere dv selbe wrchaere ie .
0,833 "wa has tv in gelait" ditze wort .
0,834 sprach si so dich alz ez sei an hort .
0,835 War vmbe sprach si so diche daz aine
0,836 sag h're waz si da mit maine /
0,837 Ich waene daz si sein vil in ir herzen tragte /
0,838 daz si so diche mit dem munde sagte .
0,839 Ovz ir herten ir niemen nemen chvnde /
0,840 daz si so diche sprichet mit dem mvnde .
0,841 Swez maister machet dev svoze dein /
0,842 daz tvot si durch die starche liebe dein /
0,843 Dv hete ez mit deine- svzem mvnde gerait .
0,844 do dv sprach "wa hapt ir lazarus gelait ."
0,845 Von ir herten ir daz niemen pringen chvnde .
0,846 Seit daz ez gesprache mit deinem mvnde .
0,847 si het dich selben da gehalten willechleychen /
0,848 da si dem wort so staetlich /
0,849 liep ist . wie liep pis tv ir selbe h're gvot .
0,850 sit si dein wort nicht mach gelazen ovz irm mvot /
0,851 O schoener iesu wie gern si dein antlveze sach .
0,852 seit si dein wort so willechleychen sprach /
0,853 wie gern het si gegrifen deine fveze /
0,854 seit ir deynev wort waren ze sprechen also sveze /

0,855 daz aver si sprach "wa hast dv in / gelait daz ni- / ich in /"
0,856 Herre dar an tvo vns chvnt ir sin /.
0,857 Daz si dich nemen wolde wie maint si daz /
0,858 daz gervoch vns herre beschayden paz /
0,859 iosep vorchte ab dem chrevze nemen deynen leip /
0,860 wie uvrchtet so lutzel ditze weip .
0,861 Er getorst in nicht genemen . wan mit vrlovp / vnt pei der nacht /
0,862 wie hat ir disev vravwe des gedacht /
0,863 daz si noch pylatum uvrchtet noh der nacht peiten wil /
0,864 waerleiche herre des ist dirre vravwen vil .
0,865 Si sprichet getrewleichen "ich wil in nemen /"
0,866 ey minne starch daz mvoz dir gezemen /
0,867 we wie getrevleichen disev vravwe redt /
0,868 waz ob er in der Iyden hovs ist gelegt .
0,869 waz wil dv danne tvon getrevwe Maria /
0,870 "da nim ich in da /"
0,871 ob er da leit da sand petern vros .
0,872 da er sein verlavgent vnt ir verchos /
0,873 da er sich wermet pey dem fivwer /
0,874 da im minne vnt gelavb waz vil tevwer .
0,875 waz wil dv danne tvon marey sag an /
0,876 "da nim ich in da vnt tragen dan /"
0,877 O wund'leichev getvrst da ist nicht wei%p /
0,878 o svezer iesu wie lieb ir waz din getrewer leip /
0,879 waz wil dv tvn ob dich meldet dev torwertlinne /
0,880 so nim ich in warta welch ain minne .
0,881 Secht dirre vravwen staete sin / fvrchtet nicht
0,882 si wil in nemen swa er leit oder swer ez sicht .
0,883 O we wie moechte ain gelavb staeter sein
0,884 o gvoter iesu war vmbe has tv vergezzen der worte deyn .
0,885 waz wil dv herre an der getrevwen rechen /
0,886 war vmbe sprichest dv nicht als dv phlaege / sprechen .
0,887 "Dein gelavbe ist / groz dir geschehe als dv wil /"
0,888 zaige dich ir want si hat dich gesvochet vil /
0,889 wa dv dich gehailet hast daz zaige ir /
0,890 da nimt si dich waerleich vil schir /
0,891 Daz si dich in ir hertze neme vnt trage /
0,892 vnt daz si dein vrstend deinen ivngern sage .
0,893 Gvoter maister dv scholt ir gir nicht langer haben /
0,894 want si hat nicht da si sich mege an gelaben .
0,895 Si hat herre dein gewartet drei tage /
0,896 Daz ir sel nicht speise hat daz ist ir chlage .
0,897 Wan mit dem prote deines leibes /
0,898 wrde der hvnger dises weibes .
0,899 Gepvezet vnt prosem vol /
0,900 wrden ir laere chorbe wol /.
0,901 Wil dv daz si nicht verderbe vnderwegen /
0,902 so rveche ir paz mit speise phlegen /

0,903 vnt pvoze ires herzen hvngernot .
0,904 want dv pist daz lebende prot .
0,905 daz gvoten levten wol gezimt /
0,906 daz leben geit vnt den tot benimt .
0,907 Dvo sprach iesus "Maria ."
0,908 Nv horet si sach vmbe sa /
0,909 Nv durch got waz sprach si /
0,910 Si sprach daz wort "Raboni /"
0,911 Daz sprichet / maister ze divte /
0,912 nv merchet wnder gvote levte .
0,913 an disem wexel der hie geschach /
0,914 Da wart groz lait we vnt ach /
0,915 ze grozen vraevden vercheret /
0,916 als vns dauit an dem salter leret /
0,917 Hec est mutacio dextere excelsi .
0,918 Daz ez des obersten zeswen wexel sei .
0,919 hie wrden gewexelt zaecher grozez smerzen /
0,920 ze minne zaecheren des innern hertzen /
0,921 want dvo si sich nennen horte .
0,922 maria / mit disem worte .
0,923 hete er sey gewont ze nennen /
0,924 Dvo begvnde si enphinden vnt erchenne- .
0,925 Eyner svezen an dem der si da / nande .
0,926 Da pei si ir maister erchande .
0,927 Vnt begvnd ir gaist aver leben /
0,928 ir wrden ir sinne wider geben /
0,929 Vnt dvo er ir mer wolt sagen /
0,930 des mocht si vor vraevden nicht vertragen /
0,931 vnt mochte langer nicht erpeiten des er wolde sprechen /
0,932 vnt begvnde seinew wort mit antwrt vnderprechen .
0,933 Si gedachte daz si des wortes nicht bedurfen scholde /
0,934 seit si daz wort het fvnden als si wolde .
0,935 Si gedacht "mir ist vil nvtzer der hort /
0,936 daz ich wort greife danne ich horte daz wort ."
0,937 O starchev vndvltigev minne /
0,938 daz des nicht genveget alle ir sinne .
0,939 Daz si Ihesum horte des wolt sei nicht genvegen /
0,940 Si wolt sich mit an greifen zve sim vuegen /
0,941 Si west wol daz solhev chraft was in im verporgen
0,942 dev den svntaere loset von allen sorgen .
0,943 O Ihesv h're allerpeste
0,944 vnt allersvezest maister als si wol weste .
0,945 Dv pist gvot den rechten hertzen /
0,946 Senfter herre dv losest den von smertzen .
0,947 d' ainvaltigen an dich gedinget .
0,948 Der dich svochet wie wol dem gelinget /
0,949 want disev dein minnerinne /
0,950 zv dir chert al ir sinne .

0,951 Vnt svechte ainvaltichleich /
 0,952 do vant si dich waerleich /
 0,953 vnt wart mer h're von dir gewert .
 0,954 danne verdienet het od' geg't .
 0,955 Nv folge wir ir nach mit solher minne /
 0,956 daz wir des selben lones werden inne .
 0,957 Svoch wir in mit chlagen vnt mit wainen /
 0,958 mit rechtem gelavben vnt mit trevwen schvl wir in mainen .
 0,959 Merch war vmbe ditz sei geschehen /
 0,960 daz er sich dise vravwen nicht lieze sehen /
 0,961 der er doch vergeben het svnde vil .
 0,962 daz tet er dar vmbe daz er dich leren wil /
 0,963 daz dv wainnest nach der gegenwart sin /
 0,964 daz er dir werde daz ist dev girde dein .
 0,965 Lerne Ihesum lieb haben lern mensch lerne .
 0,966 getrow im wol / vnt vrag nach im gerne /
 0,967 lern durch in fvrchten dehaine fraise /
 0,968 wird dvrch in arm witwe vnt waise .
 0,969 Svech dehainen troest an in /
 0,970 anderev dinch versmehen sein dein sin /
 0,971 Lerne Ihesum svoche- in deinez hertzen grabe /
 0,972 den stain deiner herte wirfe dar abe /
 0,973 Lerne vngelauben von dinem hertzen treiben /
 0,974 pei dehainen geluste dirre werld solt dv beleiben /
 0,975 alle dise werlt versmaeche lerne pei dirre vravwen .
 0,976 frage wa vnt wie dv Ihesum mvgest schavwen .
 0,977 Vindest dv nicht in / in dir noch /
 0,978 so stant hie vor vnt wain doch .
 0,979 Beleib an deinem gelavben vnt an deinen trevwen
 0,980 daz dv in nicht fvnden hast / daz la dich sere revwen /.
 0,981 Frage pitte wain vnt svoche
 0,982 da er schire widerchom vnt in dir beleiben rveche /
 0,983 daz dv im mit hohfart vertreibest daz bewar /
 0,984 zv dem grab deines h'zen da neiage dich gar .
 0,985 Sich dich aver vnt aver dr in /
 0,986 naige dich diche ze deinem hertzen hin .
 0,987 sist dv zwen engel in deins hertze- grabe .
 0,988 daz erheb dich nicht vil vaste aver /
 0,989 zwen engel sint gird zwager leben /
 0,990 dev got gvoten levten hat gegeben /
 0,991 Daz ain haizt contemplatiua /
 0,992 so haizt daz ander leben actiua .
 0,993 Swer d' zwaiger leben enphindet /
 0,994 zwen engel der in seines hertzen grab vindet /.
 0,995 Hast dv dirre girde in dir enphvnden /
 0,996 vnt hast doch Ihesum nicht fvnden .
 0,997 So la / dich der paider nicht genvegen
 0,998 vnt fleiz dich wie dv daz mvgest gefvegen /

0,999 daz dv wainest pitest vnt raste nicht /
0,1000 verdirbe in dir vnt wurde dir vnwicht .
0,1001 Svoch Ihesum vntz an die zeit /
0,1002 daz er dir sich selben widergeit .
0,1003 Gelavb dich sein e nicht . nv folge mir /
0,1004 vntz dv Ihesum vindest in dir .
0,1005 Erscheinet aver er / dir anders nicht .
0,1006 Dar vmbe en hohferte avch nicht /
0,1007 als ob dv in habst erchant /
0,1008 diemvetige dv dich sa zehant /
0,1009 Naige dih mensch nider naige /
0,1010 waine pit in daz er dir zaige .
0,1011 In sinem namen ich dir daz getar /
0,1012 wol gehaizen sich'leichen gar /
0,1013 Ob dv pei dem grabe deines h'zen beleibest /
0,1014 ob dv mit wainendem svechen vertreibest .
0,1015 Deine zit beschaidenleich /
0,1016 ob dv dich naigest diemvetichleich .
0,1017 Nimest dv pei dirre mareie pilde .
0,1018 ist dir ain iesleich troest an Ihesum wilde .
0,1019 Laest dv dehainen andern troest in deinen sin /
0,1020 so zaigt er sich dir vnt vindest in .
0,1021 So wirt er dir waerleich rechte erchant /
0,1022 vnt wirst in lobende mit trevwen zehant .
0,1023 Danne so wirst dv deinen vil werden fvnt .
0,1024 andern levten machent chvnt .
0,1025 Hey wie dv danne ivbilirest / vnt singest /
0,1026 wie rechte vroelich dv springest .
0,1027 So dv in sihest ovf varen in seines vater ere
0,1028 vnt dein gird mit im zevhen dar nach immer mere .
0,1029 vntz an / deinen tot so nimt er die sele dein
0,1030 dar nach so dein leip erstet so wil er selbe dein lon sin
0,1031 daz ez geschehe chverzleiche
0,1032 des helf vns got der reiche .
0,1033 vnt Ihesus daz wol getan chindelein /
0,1034 mit Mareien der ovzerwelt mvoter sein /.
0,1035 Des rvch ovch wesen vollaist .
0,1036 Des vater vnt des svnes vnt des hailigen gaist . AmeN .